



真心直說

高麗國普照禪師 知訥撰



清刻龍藏佛說法變相圖

古德禪師真心直說序

藝二

或曰祖師妙道可得知乎曰古不云乎道不屬知不屬不知知是妄想不知是無計若真達不疑之地猶如太虛寬廓豈可強是非耶或曰然則諸祖出世無益羣生耶曰佛祖出

藝三

頭無法與人只要衆生自見本性華嚴云知一切法即心自性成就慧身不由他悟是故佛祖不令人泥着文字只要休歇見自本心所以德山入門便棒臨濟入門便喝已是探頭太過何更立語言哉或曰昔聞馬鳴造起

信六祖演壇經黃梅傳般若皆是漸次爲人豈獨無方便於法可乎曰妙高頂上從來不許商量第二峯頭諸祖畧容話會或曰敢祈第二峯頭畧垂方便耶曰然哉是言也柰何大道玄曠非有非無真心幽微絕思絕議故

不得其門而入者雖檢五千之藏教不以爲多洞曉真心者但出一言之擬比早是剽法矣今不惜眉毛謹書數章發明真心以爲入道之基漸也是爲序

重刊真心直說序

夫真心直說者佛佛授手祖祖相傳更無別法也心者人人之本源諸佛之覺性一切萬法盡在一心之內八萬四千法門從此而出悟此心者凡聖交參迷此心者生死無際心隨事轉事隨理彰事理融和名直說者矣今比丘淨林宿生慶幸得遇斯文發心重新刊梓流通命予爲序以冠篇首予才陋語拙學問之淺無足以發明其深奧矣
畧序直說真心以塞其請耳

昔成化己丑年五月端陽日後學文定序

真心直說

真心正信

華嚴云信爲道源功德母長養一切諸善根
又唯識云信如水晶珠能清濁水故是知萬
善發生信爲前導故佛經首立如是我聞生
信之所謂也或曰祖門之信與教門信有何
異耶曰多種不同教門令人天信於因果有
愛福樂者信十善爲妙因人天爲樂果故有
樂果有樂空寂者信生滅因緣爲正因苦集
滅道爲聖果有樂佛果者信三劫六度爲大

藝二

二

因菩提涅槃爲正果祖門正信非同前也不
信一切有爲因果只要信自己本來是佛天
真自性人人具足涅槃妙體箇箇圓成不假
他求從來自備三祖云圓同太虛無欠無餘
良由取舍所以不如志公云有相身中無相

身無明路上無生路永嘉云無明實性即佛
性幻化空身即法身故知衆生本來是佛既
生正信須要解茲永明云信而不解增長無
明解而不信增長邪見故知信解相兼得入
道疾或曰初發信心未能道有利益不曰起

藝三

三

信論云若人聞是法已不生怯弱當知是人
定紹佛種必爲諸佛之所授記假使有人能
化三千大千世界滿中衆生令行十善不如
有人於一念頃正思惟此法過前功德不可
爲喻又般若經云乃至一念生淨信者如來

悉知悉見是諸衆生得如是無量福德是知
欲行千里初步要正初步若錯千里俱錯入
無爲國初信要正初信既失萬善俱退故祖
師云毫釐有差天地懸隔是此理也

真心異名

或曰已生正信未知何名真心曰離妄名真
靈鑑曰心楞嚴經中發明此心或曰但名真
心別有異號耶曰佛教祖教立名不同且佛
教者菩薩戒呼爲心地發生萬善故般若經
與作菩提與覺爲體故華嚴經立爲法界交
徹融攝故金剛經號爲如來無所從來故般
若經呼爲涅槃衆聖所歸故金光明號曰如
如真常不變故淨明經號曰法身報化依止
故起信論名曰真如不生不滅故涅槃經呼
爲佛性三身本體故圓覺中名曰總持流出
功德故勝鬘經號曰如來藏隱覆含攝故了
義經名爲圓覺破暗獨照故由是壽禪師唯
心訣云一法千名應緣立號備在衆經不能
具引或曰佛教已知祖教何如曰祖師門下
杜絕名言一名不立何更多名應感隨機其

名亦衆有時呼爲自己衆生本性故有時名
爲正眼鑑諸有相故有時號曰妙心虛靈寂
照故有時名曰主人翁從來荷負故有時呼
爲無底鉢隨處生涯故有時喚作沒絃琴韻
出今時故有時號曰無盡燈照破迷情故有
時名曰無根樹根蒂堅牢故有時呼爲吹毛
劍截斷塵根故有時喚作無爲國海宴河清
故有時號曰牟尼珠濟益貧窮故有時名曰
無鑄鎖關閉六情故乃至名泥牛木馬心源
心印心鏡心月心珠種種異名不可具錄若
達真心諸名盡曉昧此真心諸名皆滯故於
真心切宜子細

真心妙體

或曰真心已知名字其體如何耶曰放光般
若經云般若無所有相無生滅相起信論云

卷二

真如自體者一切凡夫聲聞緣覺菩薩諸佛無有增減非前際生非後際滅畢竟常恒從本已來性自滿足一切功德據此經論真心本體超出因果通貫古今不立凡聖無諸對待如大虛空徧一切處妙體凝寂絕諸戲論

不生不滅非有非無不動不搖湛然常住喚作舊日主人翁名曰威音那畔人又名空劫前自己一種平懷無纖毫瑕翳一切山河大地草木叢林萬象森羅滌淨諸法皆從中出故圓覺經云善男子無上法王有大陀羅尼

卷三

五

門名爲圓覺流出一切清淨真如菩提涅槃及波羅密教授菩薩圭峯云心也者冲虛妙粹炳煥靈明無去無來冥通三際非中非外洞徹十方不滅不生豈四山之可害離性離相奚五色之能盲故永明唯心訣云夫此心

者衆妙群靈而普會爲萬法之王三乘五性而真歸作千聖之母獨尊獨貴無比無儔實大道源是真法要信之則三世菩薩同學蓋學此心也三世諸佛同證蓋證此心也一大藏教證顯蓋顯此心也一切衆生迷妄蓋迷

此心也一切行人發悟蓋悟此心也一切諸祖相傳蓋傳此心也天下衲僧叅訪蓋叅此心也達此心則頭頭皆是物物全彰迷此心則處處顛倒念念痴狂此體是一切衆生本有之佛性乃一切世界生發之根源故世尊驚峯良久善現岩下忘言達磨少室壁觀居士毘耶杜口悉皆發明此心妙體故初入祖門庭者要先識此心體也

真心妙用

或曰妙體已知何名妙用耶曰古人云風動

心搖樹雲生性起塵若明今日事昧却本來人乃妙體起用也真心妙體本來不動安靜真常真體上妙用現前不妨隨流得妙故祖師頌云心隨萬境轉轉處寔能幽隨流認得性無喜亦無憂故一切時中動用施爲東行

西往喫飯着衣拈匙弄筯左顧右盼皆是真心妙用現前凡夫迷倒於着衣時只作着衣會喫飯時只作喫飯會一切事業但隨相轉所以在日用而不覺在目前而不知若是識性底人動用施爲不曾昧却故祖師云在胎

名神處世名人在眼觀照在耳聽聞在鼻嗅香在口談論在手執捉在足運奔徧現俱該法界收攝在一微塵知之者爲是佛性不識者喚作精魂所以道吾舞筯石鞦拈子秘魔擎叉俱胝豎指柝州打地雲岩師子莫不發

明這着大用若於日用不迷自然縱橫無礙也

真心體用一異

或曰真心體用未審是一是異耶曰約相則非一約性則非異故此體用非一非異何以

卷二

六

知然試爲論之妙體不動絕諸對待離一切相非達性契識者莫測其理也妙用隨緣應諸萬類妄立虛相似有形狀約此有相無相故非一也又用從體發用不離體體能發用體不離用約此不相離理故非異也如水以

濕爲體體無動故波以動爲相因風起故水性波相動與不動故非一也然波外無水水外無波濕性是一故非異也類上體用一異可知矣

真心在迷

卷二

七

或曰真心體用人人具有何爲聖凡不同耶
曰真心聖凡同一凡夫妄心認物失自淨性
爲此所隔所以真心不得現前但如暗中樹
影地下流泉有而不識耳故經云善男子譬
如清淨摩尼寶珠映於五色隨方各現諸愚
痴者見彼牟尼實有五色善男子圓覺淨性
現於身心隨類各應彼愚痴者說淨圓覺寔
有如是身心自性亦復如是肇論云乾坤之
內宇宙之間中有一寶秘在形山此乃真心
在纏也又慈恩云法身本有諸佛共同凡夫
由妄覆有而不覺煩惱纏裹得如來藏名裴
公云終日圓覺而未嘗圓覺者凡夫也故知
真心雖在塵勞不爲塵勞所染如白玉投泥
其色不改也

真心息妄

或曰真心在妄則是凡夫如何得出妄成聖
耶曰古云妄心無處即菩提生死涅槃本平
等經云彼之衆生幻身滅故幻心亦滅幻心
滅故幻塵亦滅幻塵滅故幻滅亦滅故非幻
不滅譬如磨鏡垢盡明現永嘉亦云心是根
法是塵兩種猶如鏡上痕痕垢盡時光始現
心法雙忘性即真性乃出妄而成真也或曰
莊生云心者其熱焦火其寒凝氷其疾俛仰
之間再俯四海之外其居也淵而靜其動也
懸而天者其惟人心乎此莊生先說凡夫心
不可治伏如此也未審宗門以何法治妄心
也曰以無心法治妄心也或曰人若無心便
同草木無心之說請施方便曰今云無心非
無心體名無心也但心中無物名曰無心如
言空瓶瓶中無物名曰空瓶非瓶體無名空

瓶也故祖師云汝但於心無事於事無心自然虛而靈寂而妙是此心旨也據此則以無妄心非無真心妙用也從來諸師說做無心工夫類各不同今總大義畧明十種

一曰覺察謂做工夫時平常絕念隄防念起

一念纔生便與覺破妄念破覺後念不生此之覺智亦不須用妄覺俱忘名曰無心故祖師云不怕念起只恐覺遲又偈云不用求真唯須息見此是息妄功夫也

二曰休歇謂做功夫時不思善不思惡心起

便休遇緣便歇古人云一條白練去冷湫湫地去古廟裏香爐去直得絕塵纖離分別如痴似兀方有少分相應此休歇安心功夫也二泯心存境謂做功夫時於一切妄念俱息不顧外境但自息心妄心已息何害有境即

古人奪人不奪境法門也故有語云是處有芳草滿城無故人又龐公云但自無心於萬物何妨萬物常圍繞此是泯心存境息妄功夫也

四泯境存心謂做功夫時將一切內外諸境

藝三

九

悉觀爲空寂只存一心孤標獨立所以古人云不與萬法爲侶不與諸塵作對心若着境心即是妄今既無境何妄之有乃真心獨照不礙於道即古人奪境不奪人也故有語云上園花已謝車馬尚駢闐又云三千劍客今何在獨計莊周定太平此是泯境存心息妄功夫也

五泯心泯境謂做功夫時先空寂外境次滅內心既內外心境俱寂畢竟妄從何有故灌溪云十方無壁落四面亦無門淨裸裸赤洒

洒即祖師人境兩俱奪法門也故有語云雲散水流去窈然天地空又云人牛俱不見正是月明時此泯心泯境息妄功夫也

六存境存心謂做功夫時心住心位境住境位有時心境相對則心不取境境不臨心各

不相到自然妄念不生於道無礙故經云是法住法位世間相常住即祖師人境俱不奪法門也故有語云一片月生海幾家人上樓又云山花千萬朵遊子不知歸此是存境存心滅妄功夫也

七内外全體謂做功夫時於山河大地日月星辰内身外器一切諸法同真心體湛然虛明無一毫異大千沙界打成一片更於何處得妄心來所以肇法師云天地與我同根萬物與我同體此是内外全體滅妄功夫也

八内外全用謂做功夫時將一切内外身心器界諸法及一切動用施爲悉觀作真心妙用一切心念纔生便是妙用現前既一切皆是妙用妄心向甚麼處安着故永嘉云無明實性即佛性幻化空身即法身志公十二時

整三

歌云平旦寅狂機内隱道人身坐卧不知元是道只麼忙忙受苦辛此是内外全用息妄功夫也

九即體即用謂做功夫時雖冥合真體一味空寂而於中内隱靈明乃體即用也靈明中

内隱空寂用即體也故永嘉云惺惺寂寂是惺惺妄想非寂寂惺惺是無計寂寂非既寂寂中不容無計惺惺中不用亂想所有妄心如何得生此是即體即用滅妄功夫也十透出體用謂做功夫時不分内外亦不辨

東西南北將四方八面只作一箇大解脫門
圓陀陀地體用不分無分毫滲漏通身打成
一片其妄何處得起古人云通身無縫罅上
下忒團圓是乃透出體用滅妄功夫也

已上十種做功夫法不須全用但得一門功
夫成就其妄自滅真心即現隨根宿習曾與
何法有緣即便習之此之功夫乃無功之功
非有心功力也此箇休歇妄心法門最緊要
故偏多說無文繁也

真心四儀

卷二

十一

或曰前說息妄未審但只坐習亦通行住等
耶曰經論多說坐習所以易成故亦通行住
等又漸成純熟故起信論云若修止者住於
靜處端坐正意不依氣息不依形色不依於
空不依地水火風乃至不依見聞覺知一切

諸想隨念皆除亦遣除想以一切法本來無
想念念不生念念不滅亦不得隨心外念境
界以心除心心若馳散即當收來住於正念
是正念者當知唯心無外境界即復此心亦
無自相念念不可得若從坐起去來進止有

所施作於一切時常念方便隨順觀察又習
純熟其心得住以心住故漸漸猛利隨順得
入真如三昧深伏煩惱信心增長速成不退
唯除疑惑不信誹謗重罪業障我慢懈怠如
是等人所不能入據此則通四儀也圓覺經
云先依如來奢摩他行堅持禁戒安處徒衆
宴坐靜室此初習也永嘉云行亦禪坐亦禪
語默動靜體安然據此亦通四儀耳總論功
力坐尚不能息心況行住等豈能入道耶若
是用得純熟底人千聖與來驚不起萬般魔

妖不迴頭豈況行住坐中不能做功夫也如人欲警恨於人乃至行住坐卧飲食動用一切時中不能忘了欲愛樂於人亦復如是且憎愛是有心中事尚於有心中容得今做功夫是無心事又何疑四儀中不常現前也只恐不信不爲若爲若信則威儀中道必不失

真心所在

或曰息妄心而真心現矣然則真心體用今在何處曰真心妙體遍一切處永嘉云不離

卷二

十二

當處常湛然覓即知君不可見經云虛空性故常不動故如來藏中無起滅故大法眼云處處菩提路頭頭功德林此即是體所在也真心妙用隨感隨現如谷應聲法燈云今古應無墜分明在目前片雲生晚谷孤鶴下遙

天所以魏府元華嚴云佛法在日用處在行住坐卧處喫茶喫飯處語言相問處所作所爲舉心動念又却不是也故知體則徧而處悉能起用但因緣有無不定故妙用不定耳非無妙用也修心之人欲入無爲海度諸生死莫迷真心體用斯在也

真心出死

或曰嘗聞見性之人出離生死然往昔諸祖是見性人皆有生有死今現見世間修道之人有生死事如何云出生死耶曰生死本無妄計爲有如人病眼見空中花或無病人說無空花病者不信目病若無空花自滅方信花無只花未滅其花亦空但病者妄執爲花非體實有也如人妄認生死爲有或無生死人告云本無生死彼人一朝妄息生死自除

卷二

十三

方知生死本來是無只生死未息時亦非實
有以妄認生死有故經云善男子一切衆生
從無始來種種顛倒猶如迷人四方易處妄
認四大爲自身相六塵緣影爲自心相譬彼
病目見空中花乃至如衆空花滅於虛空不

可說言有定滅處何以故無生處故一切衆
生於無生中妄見生滅是故說名輪轉生死
據此經文信知達悟圓覺真心本無生死今
知無生死而不能脫生死者功夫不到故也
故教中說菴婆女問文殊云明知生是不生
之法爲甚麼被生死之所流文殊云其力未
充故後有進山主問修山主云明知生是不
生之法爲甚麼却被生死之所流修云筭畢
竟成竹去如今作篋使得麼所以知無生死
不如體無生死體無生死不如契無生死契

無生死不如用無生死今人尚不知無生死
况體無生死契無生死用無生死耶故認生
死者不信無生死法不亦宜乎

真心正助

或曰如前息妄真心現前且如妄未息時但
只歇妄做無心功夫更有別法可對治諸妄
耶曰正助不同也以無心息妄爲正以習衆
善爲助譬如明鏡爲塵所覆雖以手力揩拭
要須妙藥磨瑩光始現也塵垢煩惱也手力
無心功也磨藥衆善也鏡光真心也起信論
云復次信成就發心者發何等心畧有三種
云何爲三一者真心正念真如法故二者深
心集一切善行故三者大悲心欲拔一切衆
生苦故問曰上說法界一相佛體無二何故
不唯念真如復假求學諸善也答曰譬言如大

卷三

十四

摩尼寶體性明淨而有鑛穢之垢若人雖念
實性不以方便種種磨治終無得淨以垢無
量遍一切法故修一切善行如是真如之法
體性空淨而有無量煩惱染垢若人雖念真
如不以方便種種熏習亦無得淨以垢無量
遍一切法故修一切善行以爲對治若人修
行一切善法自然歸順真如法故據此所論
以休歇妄心爲正修諸善法爲助若修善時
與無心相應不取着因果若取因果便落凡
夫人天報中難證真如不脫生死若與無心
相應乃是證真如方便脫生死之要術兼得
廣大福德金剛般若經云須菩提菩薩無住
相布施其福德不可思量今見世人有叅學
者纔知有箇本來佛性乃便自恃天真不習
衆善豈只於真心不達亦乃翻成懈怠惡道

尚不能免况脫生死此見大錯也

真心功德

或曰有心修因不疑功德矣無心修因功德
何來曰有心修因得有爲果無心爲因顯性
功德此諸功德本來自具妄復不顯今既妄

卷三

十五

除功德現前故永嘉云三身四智體中圓八
解六通心地印乃是體中自具性功德也古
頌若人靜坐一須臾勝造恒沙七寶塔寶塔
畢竟化爲塵一念淨心成正覺故知無心功
大於有心也洪州水潦和尚叅馬祖問如何
是西來的的意被馬祖一踏踏到忽然發悟
起來撫掌大笑云也大奇也大奇百千三昧
無量妙義只向一毛頭上便一時識得根源
去乃作禮而退據此則功德不從外來本自
具足也四祖謂懶融禪師曰夫百千法門同

歸方寸河沙功德總在心源一切戒門定門
慧門神通變化悉自具足不離汝心據祖師
語無心功德甚多但好事相功德者於無心
功德自不生信耳

真心驗功

或曰真心現前如何知是真心成熟無礙也
曰學道之人已得真心現前時但習氣未除
若遇熟境有時失念如牧牛雖調到牽拽隨
順處猶不敢放了鞭繩直待心調步穩趕趕
入苗稼中不傷苗稼方敢撒手也到此地步
便不用牧童鞭繩自然無傷苗稼如道人得
真心後先且用功保養有大力用方可利生
若驗此真心時先將平生所愛底境時時想
在面前如依前起憎愛心則道心未熟若不
生憎愛心是道心熟也雖然如此成熟猶是

自然不起憎愛又再驗心若遇憎愛境時特
然起憎愛心令取憎愛境界若心不起是心
無礙如露地白牛不傷苗稼也古有呵佛罵
祖者是與此心相應今見纔入宗門不知道
之遠近便學呵佛罵祖者太早計也

真心無知

卷三

六

或曰真心與妄心對境時如何辨別真妄耶
曰安心對境有知而知於順違境起貪嗔心
又於中容境起痴心也既於境上起貪嗔痴
三毒足見是妄心也祖師云逆順相爭是爲
心病故對知於不可者是妄心也若真心
者無知而知平懷圓照故異於草木不生憎
愛故異於安心即對境虛明不憎不愛無知
而知者真心故肇論云夫聖心者微妙無相
不可爲有用之彌動不可爲無乃至非有故

知而無知非無故無知而知是以無知即知無以言異於聖人心也又妄心在有著有在無著無常在二邊不知中道永嘉云捨妄心取真理取捨之心成巧僞學人不了用脩行深成認賊將爲子若是真心居有無而不落有無常處中道故祖師云不逐有緣勿住空忍一種平懷泯然自盡肇論云是以聖人處有不有居無不無雖不取於有無然不捨於有無所以和光塵勞周旋五趣寂然而往怕爾而來恬淡無爲而無不爲此說聖人垂手爲人周旋五趣接化衆生雖往來而無往來相妄心不爾故真心妄心不同也又真心乃平常心也妄心乃不平常心也或曰何名平常心也曰人人具有一點靈明湛若虛空遍一切處對俗事假名理性對妄識權號真心

卷三

十七

無分毫分別遇緣不昧無一念取捨觸物皆周不逐萬境遷移設使隨流得妙不離當處湛然覓即知君不見乃真心也或曰何名不平常心耶曰境有聖與凡境有染與淨境有斷與常境有理與事境有生與滅境有動與靜境有去與來境有好與醜境有善與惡境有因與果細論則萬別千差今乃且舉十對皆名不平常境也心隨此不平常境而生不平常境而滅不平常境心對前平常真心所以名不平常妄心也真心本具不隨不平常境生起種種差別所以名平常真心也或曰真心平常無諸異因柰何佛說因果善惡報應乎曰妄心逐種種境不了種種境遂起種種心佛說種種因果法治伏種種妄心須立因果也若此真心不逐種種境由是不起種

種心佛即不說種種法何有因果也或曰真心平常不生耶曰真心有時施用非逐境生但妙用遊戲不昧因果耳

真心所往

或曰未達真心人由迷真心故作善惡因由作善因故生善道中由作惡因故生惡道中逐業受生其理不疑若達真心人妄情歇盡契證真心無善惡因一靈身後何所依託耶曰莫謂有依託者勝無依託耶又莫將無依託者同人間飄零之蕩子似鬼趣無主之孤魂特爲此問求有依託耳或曰然曰達性則不然也一切衆生迷覺性故妄情愛念結業爲因生六趣中受善惡報假如天業爲因只得天果除合生處餘並不得受用諸趣皆爾既從其業故合生處爲樂不生處爲非樂以

合生處爲自己依託不生處爲他人依託所以有妄情則有妄因有妄因則有妄果有妄果則有依託有依託則分彼此分彼此則有不可也今達真心契無生滅之覺性起無生滅之妙用妙體真常本無生滅妙用隨緣

卷二

十八

卷二

十九

也即十方世界唯一真心全身受用無別依託又於示現門中隨意往生而無障礙故傳燈云溫操尚書問圭峯曰悟理之人一期壽終何所依託圭峯曰一切衆生無不具有靈明覺性與佛無殊若能悟此性即是法身本自無生何有依託靈明不昧了了常知無所從來亦無所去但以空寂爲自體勿認色身以靈知爲自心勿認妄念妄念若起都不隨之則臨命終時自然業不能繫雖有中陰所向自由天上人間隨意寄託此即前真心身後所阻者也

真心直說終

誠初心學人文

夫初心之人須遠離惡友親近賢善受五戒十戒等善知持犯開遮但依金口聖言莫順庸流妄說既已出家叅陪清衆常念柔和善順不得我慢貢高大者爲兄小者爲弟儻有諍者兩說和合但以慈心相向不得惡語傷人若也欺凌同伴論說是非如此出家全無利益財色之禍甚於毒蛇省已知非常須遠離無緣事則不得入他房院當屏處不得強知他事非六日不得洗浣內衣臨盥漱不得高聲涕唾行益次不得搪揆越序經行次不得開襟掉臂言談次不得高聲戲笑非要事不得出於門外有病人須慈心守護見賓客須欣然迎接逢尊長須肅恭迴避辦道具須儉約知足齋食時飲毀不得作聲執放要須

卷三

二十

安詳不得舉顏顧視不得欣厭精麤須默無言說須防護雜念須知受食但療形枯爲成道業須念般若心經觀三輪清淨不違道用赴焚脩須早暮勤行自責懈怠知衆行次不得雜亂讚唄呪願須誦文觀義不得但隨音

聲不得韻曲不調瞻敬尊顏不得攀緣異境須知自身罪障猶如山海須知理懺事懺可以消除深觀能禮所禮皆從真性緣起深信感應不虛影響相從

居衆寮須相讓不爭須遮相扶護慎詳論勝

負慎聚頭閑話慎誤着他鞋慎坐卧越次對客言談不得揚於家醜但讚院門佛事不得詣庫房見聞雜事自生疑惑非要事不得遊州獵縣與俗交通令他憎嫉失自道情儻有要事出行告住持人及管衆者令知去處若

入俗家切須堅持正念慎勿見色聞聲流蕩邪心又况披襟戲笑亂說雜事非時酒食妄作無碍之行深乖佛戒又處賢善人嫌疑之間豈爲有智慧人也住社堂慎沙彌同行慎人事往還慎見他好惡慎貪求文字慎睡眠

卷二

十一

過度慎散亂攀緣

若遇宗師陞座說法切不得於法作懸崖想生退屈心或作貫聞想生容易心當須虛懷聞之必有機發之時不得隨學語者但取口辨所謂蛇飲水成毒牛飲水成乳智學成菩提愚學成生死是也又不得於主法人生輕薄想因之於道有障不能進脩切須慎之論云如人夜行罪人執炬當路若以人惡故不受光明墮坑落澗去矣聞法之次如履薄水必須側耳目而聽玄音肅情塵而賞幽致下

堂後默坐觀之如有所疑博問先覺夕惕朝詢不濫絲髮如是乃可能生正信以道爲懷者歟無始習熱愛欲患癡纏綿意地暫伏還起如隔日瘡一切時中直須用加行方便智慧之力痛自遮護豈可閑謾游談無限虛喪

天日欲冀心宗而求出路哉但堅志節責躬匪懈知非遷善改悔調柔勤脩而觀力轉深鍊磨而行門益淨長起難遭之想道業恒新常懷慶幸之心終不退轉如是久久自然定慧圓明見自心性用如幻悲智還度衆生作

人天大福田切須勉之泰和乙丑冬月海東

曹溪山老衲 知訥 誌

皖山正凝禪師示蒙山法語 侍者錄
師見蒙山來禮先自問云你還信得及麼山云若信不及不到這裏師云十分信得更要

持戒持戒易得靈驗若無戒行如空中架樓
閣還持戒麼山云見持五戒師云此後只看
箇無字不要思量卜度不得作有無解會且
莫看經教語錄之類只單單提箇無字於十
二時中四威儀內須要惺惺如猫捕鼠如雞

藝二

二五

抱卵無令斷續未得透徹時當如老鼠咬棺
材相似不可改移時復鞭起疑云一切含靈
皆有佛性趙州因甚道無意作麼生既有疑
時默默提箇無字迴光自看只這箇無字要
識得自己要識得趙州要捉敗佛祖得人憎
處但信我如此說話驀直做將去決定有發
明時節斷不誤你云云

東山崇藏主送子行腳法語

大凡行腳須以此道爲懷不可受現成供養
了等閑過日須是將生死二字釘在額上十

二時中裂轉面皮討箇分曉始得若祇隨群
逐隊打空過時他時閻羅老子打筭飯錢莫
道我與你不說若做工夫須要日日打筭時
時點檢自轉鼓起來至二更看那裏是不得
力處那裏是打失處那裏是不打失處若如

此做將去定有到家時節有一般辦道之人
經不看佛不禮纔上蒲團便打瞌睡及至醒
來又且胡思亂想纔下禪床便與人打雜交
若如此辦道至彌勒下生也未有入手底時
節須是猛着精彩提起一箇無字晝三夜三

藝二

二五

與他厮挨不可坐在無事甲裏又不可執在
蒲團上死坐須要活弄恐雜念紛飛起時千
萬不可與他厮闘轉闘轉急多有人在這裏
不識進退解免不下成風成顛壞了一生須
向紛飛起處輕輕放下打一箇轉身下地行

一遭又上床開兩眼捏雙拳豎起脊梁依前
提起便覺清涼如一鍋湯纔下一杓冷水相
似但如此做工夫日久月深自有到家時節
工夫未得入手莫生煩惱恐煩惱魔入心若
覺省力不可生歡喜恐歡喜魔入心種種病
痛言之不盡恐衆中有老成兄弟辨道者千
萬時時請益若無將祖師做工夫底言語看
一遍如親見相似而今此道難得其人千萬
向前望汝早早打破漆桶歸來爲我揩背至
囑至囑

蒙山和尚示衆

若有來此同甘寂寞者捨此世緣除去執著
顛倒真實爲生死大事肯順庵中規矩截斷
人事隨緣受用除三更外不許睡眠不許出
街不許赴請未有發明不許看讀非公界請

不許閱經如法下三年工夫若不見性通宗
山僧替你入地獄

夫心者是世間出世間萬法之總相也萬法
即是心之別相然其別有五：一肉團心狀如
蕉蕾，生色身中，係無情攝；二緣慮心狀如野
燒，忽生忽滅，係妄想攝；三集起心狀如草子
埋伏，識田係習氣攝；四賴耶心狀如良田，納

種無厭，係無明攝；五真如心狀同虛空，廓徹
法界，係寂照攝。已上五心，前四皆妄念，念生
滅後，一是真三際，一如若不揀辯，分明猶恐
認妄爲真，其失非小。故引佛經祖語問辯，徵
釋開示，迷妄根源，指陳脩證。本末次第一十

六章始於正信終乎所往深明真心之捷徑
故名直說予獲是書僅十餘載朝夕觀覽以
爲棲神之祕要一日出示衆信善士感節菴
居士陳普忠慨然樂施綉梓泝傳庶修心之
士觀之者咸悟真心之妙迥出直說之表也
是爲跋

卷二

二十四

正統十二年歲在丁卯臘月八日

大天界蒙堂比丘

真心直說後跋